



REPUBLIKA E SHQIPËRISË
KUVENDI

PROJEKTLIGJ

Nr. /2015

**PËR
DISA SHTESA DHE NDRYSHIME NË LIGJIN NR. 8328, DATË 16.4.1998, "PËR TË
DREJTAT DHE TRAJTIMIN E TË DËNUARVE ME BURGIM DHE TË
PARABURGOSURVE", TË NDRYSHUAR**

Në mbështetje të neneve 78 dhe 83, pika 1, të Kushtetutës, me propozimin e Këshillit të Ministrave,

KUVENDI

I REPUBLIKËS SË SHQIPËRISË

VENDOSI:

Në ligjin nr. 8328, datë 16.4.1998, "Për të drejtat dhe trajtimin e të dënuarve me burgim dhe të paraburgosurve", të ndryshuar, bëhen këto shtesa dhe ndryshime:

Neni 1

Pas nenit 6, shtohet neni 6/1 me këtë përmbajtje:

"Neni 6/1

1. Për të dënuarit që vuajnë dënimin në burgun e sigurisë së lartë, në raste të jashtëzakonshme revolte ose në situata emergjence, ministri i Drejtësisë, mund të pezullojë në institucion ose në një pjesë të tij aplikimin e rregullave normale të trajtimit të të burgosurve. Pezullimi duhet të jetë i motivuar nga nevoja për të rivendosur rendin dhe sigurinë si dhe ka të përcaktuar kohëzgjatjen e domosdoshme për të arritur qëllimin.

2. Kur vërtetohen arsye serioze që lidhen me rendin dhe sigurinë publike, edhe me kërkesën e ministrit të Punëve të Brendshme, ministri i Drejtësisë mund të vendosë pezullimin në institucion ose në një pjesë të tij aplikimin e rregullave normale të trajtimit të të burgosurve, në përputhje me nevojat e rendit dhe të sigurisë. Pezullimi përfshin kufizimet e nevojshme për të ruajtur rendin dhe sigurinë në institucion si dhe për të parandaluar lidhjet me jashtë të të dënuarve me elementë kriminalë nga jashtë apo me persona me precedentë penalë. Në të tilla raste, masa mund të zgjasë deri në një vit dhe mund të zgjatet në mënyrë të njëjtë për një periudhë prej një viti, kur ka dyshime të bazuara se vazhdojnë përpjekjet për të mbajtur lidhjet me elementë kriminalë nga jashtë.

3. Të dënuarit që i nënshtrohen këtij regjimi të posaçëm qëndrojnë brenda institucionit në qeli të posaçme, të ndarë nga pjesa tjetër e të dënuarve dhe ndaj tyre zbatohen masat e mëposhtme:

a) Masa të sigurisë së lartë të brendshme dhe të jashtme, kryesisht në lidhje me nevoja për të parandaluar kontaktet me të dënuarit e tjerë, lidhjet me elementë kriminalë nga jashtë apo me persona me precedentë penalë.

b) Lejimin e një takimi në muaj, në interval kohor të përcaktuar, në ambiente që nuk lejojnë kalimin apo dhënien e sendeve gjatë takimit.

c) Lejimin e takimeve vetëm me familjarë, me përjashtim të rrethanave të jashtëzakonshme, kur njoftimi është bërë më parë dhe me miratimin e drejtorit të institucionit.

d) Lejimin e një bisede mujore telefonike me familjarët apo bashkëjetuesin, me kohëzgjatje maksimale dhjetë minuta, e cila mund të regjistrohet.

e) Kufizim në sendet që mund të marrë nga jashtë, sipas përcaktimeve në rregulloren e brendshme të institucionit.

f) Kontroll i korrespondencës, përveç asaj me subjektet e përcaktuar në nenin 43 të këtij ligji.

g) Kufizimi i kohës së shpenzuar jashtë, e cila nuk mund të kryhet në grupe prej më shumë se katër personash, nën mbikëqyrje të posaçme, për të siguruar pamundësinë absolute të komunikimit midis të burgosurve.

4. Rregullimet e mësipërme për takimet nuk zbatohen për avokatin e të dënuarit, takimet me të cilin mund të bëhen deri në tre herë në javë.

5. Ndaj Urdhrit të ministrit të Drejtësisë për pezullimin e regjimit normal të trajtimit të të dënuarit, mund të bëhet ankim në gjykatën e rrethit gjyqësor ku ndodhet institucioni, brenda 10 ditëve. Ankimi nuk pezullon zbatimin e regjimit të posaçëm.

Neni 2

Në nenin 12, pas togfjalëshit "burgu i sigurisë së ulët", shtohet togfjalëshi "burgu me regjim të hapur".

Neni 3

Neni 13 ndryshohet me këtë përmbajtje:

“Neni 13

Burgu i sigurisë së lartë

Burgu i sigurisë së lartë është institucioni ku ekzekutohen vendimet me burgim për subjekte të dënuar për krimet e parashikuara nga nenet 77, 78, 100, 101, 102, 102/a, 103, 104, 141 të Kodit Penal, si dhe për subjekte të dënuar për krimet që gjykohen nga gjykata e krimeve të rënda.

Ndryshimi i klasifikimit të sigurisë nga institucionet e ekzekutimit të vendimeve penale të sigurisë së lartë në institucione të tjera të ekzekutimit të vendimeve penale, bëhet me kërkesë të prokurorit, të dënuarit ose përfaqësuesit të tij ligjor, apo drejtorit të institucionit ku i dënuari po vuan dënimin, pranë gjykatës së rrethit gjyqësor ku ndodhet institucioni, pasi t'i ketë kryer jo më pak se 1/2 e dënimit.

Shpërndarja dhe transferimi i të dënuarve në burgjet e sigurisë së lartë bëhet nga Drejtoria e Përgjithshme e Burgjeve.

Në burgjet e sigurisë së lartë, vihen kufizime në të drejtat e të dënuarit, në rastet dhe sipas kritereve të përcaktuara shprehimisht në këtë ligj.

Në burgjet e kategorive të tjera, me urdhër të ministrit të Drejtësisë, mund të krijohen seksione të burgut të sigurisë së lartë, në të cilat zbatohen rregullat e mësipërme.”

Neni 4

Neni 14 ndryshohet me këtë përmbajtje:

“Neni 14

Burgu i sigurisë së zakonshme

Burgu i sigurisë së zakonshme është institucioni, ku ekzekutohen vendimet me burgim për subjekte të dënuar me burgim mbi 5 vjet, me përjashtim të atyre që vendosen në institucione të veçanta, në burgun e sigurisë së lartë apo në burgun e sigurisë së ulët.

Ndryshimi i klasifikimit të sigurisë nga institucionet e ekzekutimit të vendimeve penale të sigurisë së zakonshme në institucione të tjera të ekzekutimit të vendimeve penale bëhet me kërkesë të prokurorit, të dënuarit ose përfaqësuesit të tij ligjor, apo drejtorit të institucionit ku i dënuari po vuan dënimin, pranë gjykatës së rrethit gjyqësor ku ndodhet institucioni, pasi t`i ketë mbetur për të vuajtur jo më pak se 5 vjet burgim.

Shpërndarja dhe transferimi i të dënuarve në burgjet e sigurisë së zakonshme bëhen nga Drejtoria e Përgjithshme e Burgjeve.

Në burgjet e kategorive të tjera, me urdhër të ministrit të Drejtësisë mund të krijohen seksione të burgut të sigurisë së zakonshme, në të cilat zbatohen rregullat e mësipërme.”

Neni 5

Në nenin 15, ndryshohet me këtë përmbajtje.

“Neni 15

Burgu i sigurisë së ulët

Burgu i sigurisë së ulët është institucioni, ku ekzekutohen vendimet me burgim për subjekte të dënuar për kundërvajtje penale, për vepra penale të kryera nga pakujdesia dhe për vepra të tjera penale, dënimi i të cilave nuk i kalon 5 vjet burgim.

Shpërndarja dhe transferimi i të dënuarve në burgjet e sigurisë së ulët bëhet nga Drejtoria e Përgjithshme e Burgjeve.

Në burgjet e kategorive të tjera, me urdhër të ministrit të Drejtësisë, mund të krijohen seksione të burgut të sigurisë së ulët, në të cilat zbatohen rregullat e mësipërme.”

Neni 6

Pas neni 15/1, shtohet neni 15/2 me këtë përmbajtje:

“Neni 15/2
Burgu me regjim të hapur

1. Burgu me regjim të hapur është institucioni në të cilin, i dënuari kryen dënimin me mbikëqyrje dhe perimetër sigurie minimal dhe nuk mbyllet në qelitë e burgut. Ndërkohë që vuan dënimin e tij, i dënuari ka të drejtë të punojë.

2. Burgu me regjim të hapur është institucioni, ku vuhet dënimi për të dënuarit për kundërvajtje penale, për vepra penale të kryera nga pakujdesia dhe për vepra të tjera penale, dënimi i të cilave nuk i kalon 5 vjet burgim.

3. Komisioni i transferimit, me kërkesë të të dënuarit ose përfaqësuesit të tij ligjor, me kërkesë të drejtorit të institucionit ku i dënuari po vuan dënimin, apo me nismën e vet, për të dënuarit që u ka mbetur për të vuajtur më pak se 2 vjet burgim dhe kanë respektuar rregulloren e brendshme të institucionit, vendos transferimin e tyre në një burg me regjim të hapur, me kusht që i dënuari të ketë siguruar një kontratë të rregullt pune, sipas legjislacionit në fuqi për punësimin.

4. Për marrjen e vendimit për transferim, Komisioni mban në konsideratë nëse transferimi lehtëson riintegrimin e të dënuarit, ndihmon në mbajtjen e lidhjeve familjare, sociale dhe ekonomike, përmes aksesit në punësimin.

5. Komisioni i transferimit kryesohet nga Drejtori i Përgjithshëm i Burgjeve dhe ka në përbërje:

- a) tre përfaqësues të Drejtorisë së Përgjithshme të Burgjeve, përkatësisht nga
 - i. sektori ligjor;
 - ii. nga sektori i çështjeve shoqërore;
 - iii. nga sektori i çështjeve shëndetësore.

b) drejtorin e institucionit ku vuan dënimin i dënuari;

c) një përfaqësues nga Avokati i Popullit;

d) një përfaqësues nga shoqëria civile.

6. Rregullat për përzgjedhjen e përfaqësuesit nga shoqëria civile, organizimin, funksionimin, mënyrën e vendimmarrjes së Komisionit të transferimit përcaktohen në Rregulloren e Përgjithshme të Burgjeve.

7. Organizimi, disiplina e brendshme dhe kërkesat e trajtimit në kushtet e institucionit përcaktohen në rregulloren e brendshme, të dalë mbi bazë të Rregullores së Përgjithshme të Burgjeve, sipas parashikimeve të nenit 18 të ligjit.

8. Në rast të shkeljes së Rregullores së Përgjithshme të Burgjeve apo rregullores së brendshme të institucionit, Komisioni i transferimit shqyrton rastin dhe vendos me shumicën e anëtarëve të tij kthimin e të dënuarit në burgun e sigurisë së ulët.”

Neni 7

Ky ligj hyn në fuqi 15 ditë pas botimit në Fletoren Zyrtare.

K R Y E T A R I

ILIR META